

საქართველოს მთავრობის

დადგენილება

№

2011 წელი

ქ. თბილისი

**ვირტუალური ზონის პირის სტატუსის მინიჭების წესისა და პირობების და ვირტუალური ზონის პირის სტატუსის მიმნიჭებელი პირის განსაზღვრის შესახებ**

**მუხლი 1.** „საინფორმაციო ტექნოლოგიური ზონების შესახებ“ საქართველოს კანონის მე-6 მუხლის საფუძველზე:

1. დამტკიცდეს „ვირტუალური ზონის პირის სტატუსის მინიჭების წესი და პირობები“.
2. ვირტუალური ზონის პირის სტატუსის მიმნიჭებელ პირად განისაზღვროს საჯარო სამართლის იურიდიული პირი - საფინანსო-ანალიტიკური სამსახური.

**მუხლი 2.** ეს დადგენილება ამოქმედდეს გამოქვეყნებისთანავე.

პრემიერ-მინისტრი

ნიკა გილაური

## ვირტუალური ზონის პირის სტატუსის მინიჭების წესი და პირობები

### მუხლი 1. ზოგადი დებულებები

ვირტუალური ზონის პირის სტატუსის მინიჭების წესი და პირობები განსაზღვრავს ვირტუალური ზონის პირის სტატუსის კანდიდატისთვის სტატუსის მინიჭების წესს და პირობებს.

### მუხლი 2. ტერმინთა განმარტება

ამ დადგენილებაში გამოყენებულ ტერმინებს აქვს შემდეგი მნიშვნელობა:

ა) ვირტუალური ზონის პირი - იურიდიული პირი, რომელიც ახორციელებს საინფორმაციო ტექნოლოგიურ საქმიანობას და მინიჭებული აქვს შესაბამისი სტატუსი;

ბ) საინფორმაციო ტექნოლოგიები - კომპიუტერული საინფორმაციო სისტემების, კერძოდ, პროგრამული უზრუნველყოფის პროდუქტების და კომპიუტერული მოწყობილობების შესწავლა, პროექტირება, შემუშავება, დანერგვა, მხარდაჭერა და მენეჯმენტი.

გ) ვირტუალური ზონის პირის სერტიფიკატი (შემდგომში - სერტიფიკატი) - ვირტუალური ზონის პირის სტატუსის დამადასტურებელი ელექტრონული სერტიფიკატი, რომლითაც დასტურდება ვირტუალური ზონის პირის სტატუსი.

დ) ვირტუალური ზონის პირის კანდიდატი (შემდგომში - კანდიდატი) - იურიდიული პირი, რომელიც ახორციელებს საინფორმაციო ტექნოლოგიურ საქმიანობას და სტატუსის მოსაპოვებლად მიმართავს სსიპ - საფინანსო-ანალიტიკურ სამსახურს.

### მუხლი 3. სტატუსის მინიჭების წესი და პირობები

1. ვირტუალური ზონის პირის კანდიდატმა სტატუსის მისაღებად ელექტრონულად ან მატერიალური ფორმით განცხადებით უნდა მიმართოს სსიპ - საფინანსო-ანალიტიკურ სამსახურს.

2. განცხადებას ასევე უნდა დაერთოს:

ა) ამონაწერი მეწარმეთა და არასამეწარმეო (არაკომერციული) იურიდიულ პირთა რეესტრიდან;

ბ) იურიდიული პირის წესდება;

გ) უკანასკნელი სამი წლის განმავლობაში საინფორმაციო-ტექნოლოგიური პროექტების ჩამონათვალი (ასეთის არსებობის შემთხვევაში).

3. სსიპ - საფინანსო-ანალიტიკური სამსახური უფლებამოსილია დამატებით მოითხოვოს ინფორმაცია კანდიდატის მიერ საინფორმაციო ტექნოლოგიურ საქმიანობასთან დაკავშირებით.

4. სსიპ - საინფორმაციო-ანალიტიკური სამსახური ვალდებულია უზრუნველყოს ამ მუხლის მე-3 პუნქტის შესაბამისად მიღებული ინფორმაციის კონფიდენციალურობა.

#### **მუხლი 4. სტატუსის მინიჭების ვადები**

1. კანდიდატს სტატუსი ენიჭება განაცხადის წარდგენიდან 10 სამუშაო დღეში.
2. სტატუსის მინიჭების შემდგომ 2 სამუშაო დღის განმავლობაში სსიპ - საფინანსო-ანალიტიკური სამსახურის მიერ კანდიდატს გადაეცემა სერტიფიკატი.
3. სერტიფიკატი გაიცემა ერთი წლის ვადით, განხორციელებული საქმიანობის შესახებ წლიური ანგარიშის წარდგენამდე.
4. ანგარიშის წარდგენის ვადის გადაცილების, ასევე წარუდგენლობის შემთხვევაში სერტიფიკატი უქმდება ავტომატურად.
5. სერტიფიკატის ერთ წლიანი ვადის ამოწურვის გამო გაუქმების შემთხვევაში, იურიდიული პირი ვალდებულია მის მისაღებად განახორციელოს ამ წესით განსაზღვრული ყველა პროცედურა.